

孝

經

大

全

孝經大全卷之十六

明新安呂維祺箋次

曾子孝行

呂維祺曰孔門以孝稱者如閔子子路  
諸賢非一人也而曾子之孝最著酒肉  
養志羊棗不忍孟子論之尚矣耘瓜搯  
臂烝梨集烏諸事不可盡信然其言曰  
吾不忍遠親而爲人役又曰子欲養而  
親不待木欲靜而風不止每讀喪禮泣

下沾襟病革易簀得正而斃亦可以想  
見其事親守身之概矣與純孝之人言  
孝治天下之道以傳之天下萬世所謂  
傳得其宗者焉可誣也次曾子孝行

孟子曰曾子養曾皙必有酒肉將徹必請所  
與問有餘必曰有曾皙死曾元養曾子必有  
酒肉將徹不請所與問有餘曰亡矣將以復  
進也此所謂養口體者也若曾子則可謂養  
志也事親若曾子者可也

養並去聲  
下同

曾子立廉不飲盜泉所謂養志也

曾皙嗜羊棗而曾子不忍食羊棗公孫丑問  
曰膾炙與羊棗孰美孟子曰膾炙哉公孫丑  
曰然則曾子何爲食膾炙而不食羊棗曰膾  
炙所同也羊棗所獨也諱名不諱姓姓所同  
也名所獨也

曾子從仲尼在楚心動歸問母母曰思爾嚙  
指孔子聞之曰參之至誠精感萬里

曾子出薪於野有客至而欲歸母曰願留參

方到母卽以手搯其左臂立痛馳至問母母  
曰客來欲去吾搯臂以呼汝耳

曾子耘瓜誤斬其根曾皙怒建大杖擊之曾  
子仆地有頃而蘇蹶然而起曰大人教參得  
無勞乎乃退援琴而歌欲令曾皙聞之知其  
體康也孔子聞之曰參來勿內三日曾子因  
客而見孔子孔子曰汝聞瞽瞍有子曰舜乎  
舜之事父也索而使之未嘗不在側求而殺  
之未嘗可得小箠則待大箠則走以逃暴怒

也今子拱立而不去殺身陷父以不義不孝孰大是乎曾子曰參罪大矣

內同納

曾子耘瓜三足鳥集其冠

曾子至孝爲父所憎嘗見絕良久而後蘇曾子見孔子未嘗不問安親之道也

曾子後母遇之無恩而供養不衰及其妻以梨烝不熟因出之人曰非七出也曾子曰梨烝小物耳吾欲使之熟而不用吾命况大事乎遂出之終身不娶子元請焉曾子曰高宗

以後妻殺孝已尹吉甫以後妻放伯奇吾上不及高宗中不比吉甫庸知其得免於非乎

按曾子去妻黎烝不熟或問曰婦有七出不熟亦預乎曰吾聞之也絕交令可友出妻令可嫁也黎烝不熟而已何問其故乎

曾子事孔子十有餘年晨覺眷然念二親皆衰養不能備於是援琴鼓之作歸耕操曰歛

歛歸耕兮安所耕歷山兮盤桓

操去聲

曾子敝衣力耕泰山下天雨雪凍甚旬月不

得歸思其父母作梁山歌

兩去聲

齊嘗欲聘曾子爲卿曾子不就曰吾父母老  
食人之祿則憂人之事故不忍遠親而爲人  
後曾子仕於莒得粟三秉方是之時曾子重  
其祿而輕其身親沒之後齊迎以相楚迎以  
令尹晉迎以上卿方是之時曾子重其身而  
輕其祿懷其寶而迷其國者不可與語仁窘  
其身而約其親者不可與語孝任重道遠者  
不擇地而息家貧親老者不擇官而仕故君



子躋褐趨時當務爲急

遠相並  
去聲

曾子食生魚甚美因吐之人問其故曾子曰  
母在之日不知生魚味今我食美故吐之遂  
終身不食魚

曾子曰吾及親仕三釜而心樂後仕三十鍾  
而不洎吾心悲

樂音  
雛

曾子曰子欲養而親不待木欲靜而風不止  
是故推牛而祭墓不如鷄豚逮親存也故吾  
嘗事齊爲吏祿不過鍾釜尚猶欣欣而喜者

樂其逮親也既沒之後吾嘗南遊於楚轉轂  
百乘猶北嚮而泣者悲不逮吾親也故家貧  
親老不擇官而仕

樂音  
維

曾子謂子思曰伋吾執親之喪也水漿不入  
於口七日子思曰先王之制禮也過焉者俯  
而就之不及焉者跂而及之故君子之執親  
喪也水漿不及於口者三日杖而後能起

三日中制也七日則幾於滅性矣有扶而  
起有杖而起者有垢面而已者

孝經大全卷之十六  
曾子每讀喪禮泣下沾襟嘗以一夕五起視  
衣厚薄枕之高卑

曾子攀柩車引輶者爲之止也

曾子欲往鄭而至勝母里旋車而返也

曾子見益母草而感

曾子居曲阜賜梟不入城郭

吳起東出衛郭門與其母訣齧臂而盟不復  
入衛遂事曾子居頃之其母死起終不歸曾  
子薄之而與起絕

曾子寢疾病樂正子春坐於牀下曾元曾申  
坐於足童子隅坐而執燭童子曰華而睨大  
夫之簀與子春曰止曾子聞之瞿然曰呼曰  
華而睨大夫之簀與曾子曰然斯季孫之賜  
也我未之能易也元起易簀曾元曰夫子之  
病革矣不可以變幸而至於旦請敬易之曾  
子曰爾之愛我也不如彼君子之愛人也以  
德細人之愛人也以姑息吾何求哉吾得正  
而斃焉斯已矣舉扶而易之反席未安而沒

華者畫飾之美好皖者節目之平瑩簣簞也止使童子勿言也瞿然如有所驚也呼者歎而嘘氣之聲曰童子再言也革急也變動也彼謂童子也童子之意以爲曾子未嘗爲大夫不宜卧大夫之簣曾子識其意故然之且言此魯大夫季孫之賜耳於是必欲易之易之而沒可謂斃於正矣朱子曰易簣結纓未須論優劣但看古人謹於禮法不以死生之變易其所守如此

便使人有行一不義殺一不辜而得天下  
不爲之心此是緊要處

祺按曾子易簣得正而斃皆從戰戰兢兢  
中來曾子體認孝經可謂任重而道遠矣

孝經大全卷之十七

明新安呂維祺箋次

曾子論贊

呂維祺曰古今論贊曾子者甚多今錄其醇正者數則如程子謂傳孔子之道者曾子一人而已朱子謂曾子學以躬行爲主而得聞乎一貫之妙然其所以自守而終身者則固未嘗離乎孝敬信讓之規陸象山謂子思獨師曾子則平

曰夫子爲子思擇師友可知其他論贊  
非一皆足以証曾子得傳孔子之道與  
孝經授受之實學者不可不知次曾子  
論贊

衛將軍文子問于子貢曰吾聞孔子之施教  
也先之以詩書而導之以孝悌說之以仁義  
觀之以禮樂然後成之以文德蓋入室升堂  
者七十有餘人其孰爲賢子貢對以不知文  
子曰請聞其行子貢曰滿而不盈實而如虛



過之如不及先王難之其貌恭其德敦其言  
於人也無所不信其驕大人也常以浩浩是  
曾參之行也

說音悅行  
並去聲

程子曰傳孔子之道者曾子一人而已

朱子曰曾子之爲人敦厚質實而其學專以  
躬行爲主故其真積久而得以聞乎一以貫  
之之妙然其所以自守而終身者則固未嘗  
離乎孝敬信讓之規而其制行立身又專以  
輕富貴守貧賤不求人知爲大是以從之遊

者所聞雖或甚淺亦不失爲謹厚修潔之人  
所記雖疎亦必有以切於日用躬行之實  
徐幹曰曾參之孝有虞不能易

說文曰孔子家兒不知怒曾子家兒不知罵  
所以然者生而善教也

宋氏濂曰曾子年七十文學始就乃能著書  
孔子曰參也魯益少時止以孝顯未如晚節  
之該洽也

淮南子曰公西華之養親若與朋友處曾參

之養親也若事嚴主烈君其於養一也

養並去聲

陸賈曰曾子孝於父母昏定晨省調寒溫適輕重勉之於糜粥之間行之於衽席之上而美德重於後世

桓寬曰周襄王之母非無酒肉也衣食非不如曾皙也然而被不孝之名以其不能事父母

陳止齋曰自子胥以忠稱於吳曾參以孝稱於魯則忠臣孝子稀疏寥落如參辰相望矣

曾子安可與子胥並論意是而語非

莊周曰人莫不欲其子之孝而孝未必愛故  
孝已憂而曾參悲

陸象山曰伯魚死子思乃夫子嫡孫夫子之  
門人光耀於當世者甚多而子思獨師曾子  
則平日夫子爲子思擇師者可知矣

爲去聲

只爲曾子得其宗故子思孟子一脉相傳

斯文在茲

高氏子略曰曾子與其弟子公明儀樂正子

春單居離曾元曾華之徒講論孝行之道天

地事物之原

行去聲

楊氏曰孔子歿群弟子離散分處諸侯之國雖各以所聞授弟子然得其傳者蓋寡故子夏之後有田子方子方之後爲莊周其去本寢遠矣獨曾子之後子思孟子之傳得其宗宋高宗贊曰夫孝要道用訓群生以綱百行以通神明因子侍師答問成經事親之實代

爲儀刑

夫音扶行去聲

蘇頲贊曰百行之極三才以教聖人敘經曾  
氏知孝全謂手足動稱容貌事君事親是則  
是做行去聲

楊起元贊曰曾子行孝孔聖說經經於何在  
在吾此身首圓足方耳聰目明人人具足物  
物完成離身無孝離孝無身立身行道身立  
道行光於四海通於神明至德要道地義天  
經我今持誦不得循聲願明實義廣育群英  
上尊主德下庇斯民庶幾夙夜無忝所生

呂維祺曰按孔曾論孝曾子孝言曾子  
孝行曾子論贊四則皆足以証曾子得  
孔子傳孝之宗雖其文亦有未盡醇其  
事亦有未可盡信者而孔子所傳之大  
孝與曾子平日之篤孝皆於此可見學  
者誠由是而入焉庶乎其近道矣張無  
垢謂人各有入道處曾子由孝而入得  
旨哉

孝經大全卷之十七

終

孝經大全卷之十八

明新安呂維祺箋次

表章通考

宸翰

明太祖高皇帝教民六諭

孝順父母尊敬長上和睦鄉里教訓子孫各  
安生理毋作非爲

臣呂維祺曰我

太祖高皇帝以孝治天下見解縉養志堂記



孝經大全卷之十八  
至于振木鐸而勸百姓以孝順因巢鵠  
而許百官之歸養乃孝經中明王孝治  
之一端也是以在位三十餘年百祥雲  
集吏清民安海內殷富功德文章巍然  
煥然過古遠矣謚曰大孝蓋與虞舜比  
隆云

成祖文皇帝御製孝順事實序

永樂十八年  
五月

朕惟天經地義莫尊乎親降衷秉彝莫先于  
孝故孝者百行之本萬善之原大足以動天

地感鬼神微足以化彊暴格鳥獸乎草木是  
皆出于天理民彝之自然非有所矯揉而爲  
之者也然自古帝王公卿下及民庶孝行稱  
于當時有傳于後世者不可殫紀往往散見  
于篇籍難以考索朕嘗歷求史傳諸書所載  
孝行卓然可述者得二百七人復各爲之論  
斷并系以詩次爲十卷名曰孝順事實俾觀  
者屬目之頃可以盡得其爲孝之道油然而興  
其愛親之心歡然盡其爲子之職則人倫明

風俗美豈不有裨于世教者乎然尚慮聞見之不廣采輯之未備致有滄海遺珠之歎後之君子苟能體朕是心廣搜博采以續夫是編之作則於天下後世深有賴焉是爲序

臣呂維祺曰我

成祖文皇帝以孝治天下見孝順事實一書天經地義民行之旨于黃香發之身體髮膚不敢毀傷之旨于范宣發之疾致其憂喪致其哀之旨于張稷發之生事

愛敬死事哀戚之旨于孝肅發之立身  
行道揚名顯親之旨于日知永叔發之  
事親孝故忠可移于君之旨于玄暉九  
齡高登發之至于孝爲德本則四見意  
焉孝通神明則屢致歎焉若乃天性二  
字闡發尤明謂學以涵養其性非性由  
學而有也又于王中之論敘獨詳焉其  
曰孝經者聖賢之格言大訓又曰孝者  
百行之原萬善之本其道孝經一書備

矣表章此經如此故禮樂明備教化大  
行上下咸和年穀屢豐道不拾遺人無  
爭訟海外諸國歸依王化者三十餘處  
謚曰至孝殆無所不通之謂歟

崇禎皇帝聖諭

崇禎六年正月

祖制設科取士專爲致治求賢近來士習日  
偷貢舉失當人材鮮少理道不張皆由督學  
師教各官董率乖方培養無術盡失舊制初  
意以致朝廷不獲收用人之效朕思士子讀

書進身乃人才根源必宜首重德行幼學壯  
行如平生果係孝悌廉讓自然做官時不貪  
不欺盡忠竭節何必專主文藝據會典及提  
學勅書內敦尚行誼以勵頽俗不啻論文優  
劣開載甚明近來通不遵行至孝經小學諸  
書及州縣各有社學原欲養蒙育德敷教儲  
才近來全不講究興舉其士子自童時入塾  
以迫應試登科只以富貴溫飽爲志竟不知  
立身修行忠君愛民之大道如此教化不明

士風吏治安得不日趨卑下朕惟

祖宗朝求才用賢原不盡拘資格科目至考試文義正欲因言證人亦非專尚浮詞務華遺實今欲祇遵

祖制起敝還醇童子必入學遇試先查德行自童儒以及鄉會須有實蹟方許入場異日敗行考官挨論酌古準今宜有法則規條頒行遵守又教官爲士子師長化導最親舊制甚重近皆以衰庸充數教術全廢皆由士風

不正之源今設法典紀着吏禮二部同都察院及該科詳議的確具奏至海內之士豈無潛修碩德純學鴻才清志剛方實堪大用者更宜特拔一二以示風勸至于科道不必專出考選官員應令先歷推知并着酌議來行

臣呂維祺曰我

皇上天聰天明善繼善述躬行孝道首以教化爲先曰孝經小學原欲養蒙育德敷教儲才近來全不講究興舉而其



制旨又曰孝經委宜表章又曰孝經考試命題該部酌議又曰朕不敢與

天地

祖宗並此不敢之心卽孔子所云不敢惡于人不敢慢于人不敢遺小國之臣之心也以此治天下將愛敬盡于事親德教加于百姓刑于四海

明王孝治之效庶可立奏昔元隱士釣滄子嘗云五百年必有明王在上興起振作

表章是經今以熙孝經之年計適逢五  
百之會

天意未喪之斯文

孔聖不朽之志行端有默屬矣

附御製孝經制旨序

唐玄宗

朕聞上古其風朴畧雖因心之孝已萌而資  
敬之禮猶簡及乎仁義既有親譽益著聖人  
知孝之可以教人也故因嚴以教敬因親以  
教愛於是以順移忠之道昭矣立身揚名之

義彰矣子曰吾志在春秋行在孝經是知孝者德之本歟經曰昔者明王之以孝治天下也不敢遺小國之臣而況於公侯伯子男乎朕嘗三復斯言景行先哲雖無德教加於百姓庶幾廣愛刑于四海嗟乎夫子沒而微言絕異端起而大義乖況泯絕於秦得之者皆煨燼之末濫觴於漢傳之者皆糟粕之餘故魯史春秋學開五傳國風雅頌分爲四詩去聖愈遠源流益別近觀孝經舊註踳駁尤甚

至于跡相祖述殆且百家業擅專門猶將十  
室希升堂者必自開戶牖攀逸駕者必騁殊  
軌轍是以道隱小成言隱浮僞且傳以通經  
爲義義以必當爲主至當歸一精義無二安  
得不剪其繁蕪而撮其樞要也韋昭王肅先  
儒之領袖虞翻劉邵抑又次焉劉炫明安國  
之本陸澄譏康成之註在理或當何必求人  
今故特舉六家之異同會五經之旨趣約文  
敷暢義則昭然分註錯經理亦條貫寫之琬

琰底有補于將來且夫子談經志取垂訓雖  
五孝之用則別而百行之源不殊是以一章  
之中凡有數句一句之內意有兼明具載則  
文繁略之又義闕今存於疏用廣發揮

仁和金鍾曰唐玄宗天資明睿勵精求  
治於開元天寶之初親註疏義書勒辟  
雍至今稱爲石臺孝經夫親爲訓註以  
明孝也書題隸古以尊經也列之學官  
以示教也可謂得致治之要矣雖其修

身齊家鮮克有終然其書迄今家傳人  
誦爲蒙習養正之書所以維持世教以  
延唐家三百年之祚未必不基本於是  
也

呂維祺曰此序唐玄宗所製雖其行事  
不免爲孝德之累其制旨註解亦無甚  
足觀然石臺刻布炳照千古朱子漸謂  
先王之功得聖經而始明孔子之經得  
御序而益顯當是唐朝第一篇文字故

孝經大全卷之十八  
君子不以人廢言如玄宗表章孝經是  
也

孝經大全卷之十八

終

孝經大全卷之十九

明新安呂維祺箋次

表章通考

人告

表 劉子 進呈 疏

進孝經表

唐李齊古

臣齊古言臣聞孝經者天經地義之極至德  
要道之源在六籍之上爲百行之本自

文宣旣歿後賢所注雖事有發揮而理甚垂  
舛伏惟開元天寶聖文神武皇帝陛下敦穆



孝理躬親筆削以無方之聖討正舊經以不  
測之神改作新注朗然如日月之照邈矣合  
天地之德使家藏其本人習斯文普天之下  
罔不欣戴仍以太學王化所先孝經聖理之  
本分命壁沼特建石臺義展膚詞書題御翰  
以垂百代之則故得萬國之歡今刊勒旣終  
功績斯著天文炳煥開七曜之光輝聖札飛  
騰奪五雲之氣色煙花相照龍鳳沓起實可  
配南山之壽增北極之尊百寮是瞻四方取

則豈比周官之禮空懸象魏孔氏之書但藏  
屋壁臣之何幸躬覩盛事遇陛下興其五孝  
忝守國庠率胄子歌其六德敢揚文教不勝  
欣躍之至謹打石臺孝經本分爲上下兩卷  
謹於光順門奉獻兩本以聞臣齊古誠惶誠  
恐頓首頓首死罪死罪謹言

御批孝者德之本教之所由生也故親自訓  
注垂範將來今石臺畢工亦卿之善職覽所  
進本深嘉用心

進古文孝經指解表

嘉祐元年作

宋涑水司馬光

臣光言臣聞聖人之德莫加於孝猶江河之有源草木之有本源遠則流大本固則葉繁是以由古及今臣畜四海未有孝不先隆而能宣昭功化者也伏惟尊號皇帝陛下純孝之性發於自然動靜云爲必咨訓典起居出入不忘先烈以爲滁州者太祖皇帝所以擒馘姦桀肇開王迹并州者太祖皇帝所以芟

除僭亂混一九圍澶州者真宗皇帝所以攘  
却貪殘又寧華夏皆大勲懿業威靈所存遂  
命有司分建原廟圖續聖容躬題扁榜嚴奉  
之禮備盡恭勤羽衛供帳率從豐衍茲有以  
見陛下尊顯祖宗之意無不至矣經曰愛敬  
盡於事親而德教加於百姓刑於四海夫以  
陛下天授之資愛敬之志而又念夫百官者  
祖宗之百官不可以私非其人府庫者祖宗  
之府庫不可以賞非其功法令者祖宗之法

令不可以罰非其罪申之重之益自儆戒如  
是則爲無不成求無不給榮名之彰炳於日  
月基緒之固巍如泰山黎民乂安四海懷服  
草木禽魚靡不茂豫此誠孝德之極致也臣  
愚幸得補文館之缺以經史爲職竊覩秘閣  
所藏古文孝經先秦舊書傳注遺逸孤學湮  
微不絕如綫是敢不自揆量妄以所聞爲之  
指解雖才識褊淺無能發明庶幾因聖人之  
言得少闢省覽則糞土之臣榮願足矣其亡

文孝經解一卷謹隨表奉進以聞

進孝經指解劄子

元豐八年十二月二日

宋涑水司馬光

臣竊惟自古五帝三王未有不由學以成其  
聖德者所謂學者非誦章句習筆札作文辭  
也在於正心修身齊家治國明明德於天下  
也恭惟皇帝陛下肇承基緒雖年在幼冲而  
執喪臨朝率禮弗越體貌尊嚴舉止安重願  
顒叩叩有老成之德中外瞻仰無不愛戴此

乃聖性自然不聞亦式實天祐皇家宗廟社稷生民之盛福也然玉不琢不成器人不學不知道儻復資學問以成之則堯舜禹湯文武何遠之有伏見近降聖旨過冬至開講筵臣竊以聖人之德無以加於孝自天子至於庶人莫不始於事親終於立身揚名於後世誠爲學所宜先也臣鄉不自揆嘗撰古文孝經指解皇祐中獻於仁宗皇帝竊慮歲久遺失不存今則繕寫爲一本上進伏乞聖明少

賜省覽取進止

進呈古文孝經指解序 宋涑水司馬光

聖人言則爲經動則爲法故孔子與曾參論孝而門人書之謂之孝經及傳授滋久章句漫差孔氏之人畏其流蕩失真故取其先世定本雜虞夏商周之書及論語藏諸壁中苟使人或知之則旋踵散失故雖子孫不以告也遭秦滅學天下之書掃地無遺漢興河間人顏芝之子得孝經十八章儒者相與傳之



是爲今文及魯恭王壞孔子宅而古文始出  
凡二十二章當是之時今文之學已盈故古  
文排擯不得列於學宮獨孔安國及後漢馬  
融爲之傳諸儒黨同疾異信僞疑真是以歷  
載累百而孤學沉厭人無知者隋開皇中秘  
書學士王逸於陳人處得之河間劉炫爲之  
作稽疑一篇將以興墜起廢而時人已多譏  
笑之者及唐明皇開元中詔議孔鄭二家劉  
知幾以爲宜行孔廢鄭於是諸儒爭難蠹起

本行鄭學及明皇自注遂用十八章爲定先  
儒皆以爲孔氏避秦禁而藏書臣竊疑其不  
然何則秦世蝌蚪之書廢絕已久又始皇三  
十四年始下焚書之令距漢興纔七年耳孔  
氏子孫豈容悉無知者必待恭王然後廼出  
蓋始藏之時去聖未遠其書最真與夫佗國  
之人轉相傳授歷世疎遠者誠不侔矣且孝  
經與尚書俱出壁中今人皆知尚書之真而  
疑孝經之僞是何異信膾之可嚼而疑炙之

不可食也嗟乎真儒之明儼若日月而歷世  
爭論不能自伸其中異同不多然要爲得正  
此學者所當重惜也前世中孝經多者五十  
餘家少者亦不減十家今秘閣所藏止有鄭  
氏明皇及古文三家而已其古文有經無傳  
按孔安國以古文時無通者故以隸體寫尚  
書而傳之然則論語孝經不必獨用古文此  
蓋後世好事者用孔氏傳本更以古文寫真  
其文則非其語則是也夫聖人之經高深幽

遠固非一人所能獨了是以前世並存百家之說使明者擇焉所以廣思慮重經術也臣愚雖不足以度越前人之胸臆闕望先聖之藩籬至於時有所見亦各言爾志之義是敢輒以隸寫古文爲之指解其今文舊注有未盡者引而伸之其不合者易而去之亦未知此之爲是而彼之爲非然經猶的也一人射之不若衆人射之其爲取中多也臣不敢避狂僭之罪而庶幾於先王之道萬一有所裨

焉

表章孝經疏

明婺源江旭奇

監生

臣惟孝經一書孔子手著其始成也師與弟子祭告天地見雲物垂星象孔子曰我行在孝經漢孝宣時疏廣疏受以之訓儲孝章時介胄皆通孝經孝靈時向栩言北向讀孝經賊自消滅隋蘇威言惟孝經一卷足以立身治國何用多爲隋主納其言以孝經賜鄭譯周賓興六行曰孝友睦婣任恤齊內政公問

卿子之鄉有孝於父母者有則以告有而不告謂之蔽明漢元朔間有司議不舉孝以不敬論唐制舉明經孝經爲九經之首宋詔察孝弟力田而明經仍唐制我

太祖高皇帝諭俗首孝順父母亦有孝弟力田通經孝廉等科後來廣輯經書大全命題試士孝經偶遺實有待於

皇上臣幼時臣母猶能以孝經小學口授於臣謂臣曰古人先通孝經後及論語小學宋

孝經大全卷之十一  
朱熹八歲通孝經大義曰若不如便不成  
人元許衡敬小學如神明臣觀孝經先至德  
要道顯親揚名而後廣之小學先立教明倫  
敬身而後亦廣之是體裁一稟於孝經也今  
世儒童生員鮮讀二書者臣以爲厚人心淳  
風俗實爲王道誠於考試間以命題則孔曾  
傳授之密旨與朱熹嘉惠後學之盛心爲世  
誦法自能培植根本延綿命脉臣所謂表章  
首經者此也臣聞人之一心私欲淨盡之後

當以義理養之漢諸葛亮曰非淡泊無以明  
志非寧靜無以致遠而其勸後主一則曰先  
帝再則曰先帝無非以孝啟沃其君心也唐  
張巡言欲知人倫纔識天道宋岳飛涅背盡  
忠事母至孝聖門四科德行爲首忠孝如是  
况其省卒分班以少禦衆屯田錯處因糧於  
敵政事如是國學鄉學彞倫明倫示人效法  
皆未從祀亦有待於

皇上也我



世宗皇帝於文廟進祀歐陽修以其濮議有裨於孝思也願

皇上效法進祀三人顧瞻景企人心固結國運靈長周年漢祚當遠過之臣所謂顯示臣鵠者此也崇禎二年正月二十日恭逢

駕臨御爰倫堂具奏二十一日奉

聖旨江旭奇欣逢盛典奏請進書意亦可嘉孝經疏義留覽其考試命題併前代諸臣祀事該部酌議具奏欽此

禮部覆表章孝經疏 明粵東陳子壯

題爲

聖帝表章孝經愚臣遵奉註解恭呈睿覽以  
弘孝治事儀制清吏司案呈奉本部送崇禎  
七年十二月二十四日禮科抄出湖廣黃州  
府蘄州黃梅縣儒學廩膳生員瞿罕奏前事  
內稱臣僻處山林伏聞崇禎二年正月內欽  
奉

聖旨欲以孝經考試命題仰見

皇上仁孝格天精誠法祖親祀園丘方澤是  
父天母地之聖孝也祇肅禴祀蒸嘗是尊祖  
敬宗之聖孝也特頒綸綍崇重孝經睿識神  
謨卓冠萬古真遠符帝舜而不承祖烈矣臣  
伏念今天下知有四書五經大全自

成祖文皇帝始也孝經者四書五經之母心  
性道德之源也今明詔欲以孝經命題試士  
者自

皇上始也是以孝經在聖代猶未及與四書

五經上並列於經筵下同頒於庠序者正造  
物陰閱留之以俟我

皇上之表章也然而六年之間覆請如舊意  
者疑孝經有古文與今文之異乎夫古文與  
今文原無異也所異者獨闕門一章爲唐時  
刪去與一二字句不同耳及宋臣司馬光進  
孝經指解朱熹作孝經刊誤皆遵信孝經古  
文也

聖朝明經取士悉從朱註則論斷孝經旣當

以孔氏古文爲正而考定篇次自當以朱熹  
刊誤爲宗矣臣是以從朱熹所定者句解各  
章名曰孝經貫註其原爲朱熹所刪者附註  
於後名曰孝經存餘較勘古文今文篇次之  
不同名曰孝經考異歷敘作經傳經世代之  
相傳名曰孝經對問蓋古今有孝之理便有  
孝之事臣因想註疏大全語錄中原與孝經  
貫徹者旁引以明其理復考子史志書譜牒  
中可與孝經配合者廣譬以證其事總欲以

孝經各章之理貫於五經因而借歷朝五等  
之文貫於一孝以期闡發幽光鋪揚

祖德上贊

聖皇之孝治下副先臣之教誨耳臣祖太僕  
寺少卿晟臣父翰林院待詔九思臣兄舉人  
甲四世感被國恩隆天極地况臣父九思繆  
以學行累薦隱逸蒙

神宗顯皇帝屢旨擢用於生前

熹宗愍皇帝特旨褒闡於身後六年五月內

伏蒙聖恩有瞿九思近例何不詳述還着明白奏來之旨臣雖卑賤更蒙聖恩拔置學庠歲廩公廩七經提學遵奉禮部題欵獎臣孝行臣矢以孝經終身閉戶潛心歲旣六更稿凡數易今年秋仲始克成編邑人石確以同學之誼爲臣商訂臣謹徒步詣闕薰沐進呈伏乞

皇上俯覽愚忱少垂睿照如或有一得之愚乞勅該部看詳頒布以成皇上六年欲行未

竟之旨且臣聞孔子自道之言曰志在春秋  
行在孝經而註疏又曰孝經之文同春秋而  
作今詞臣捧命進講春秋綱常大義揭日月  
而中天更乞皇上將孝經前旨未及推行詔  
今學官士子共相講習發策決科或從今始  
則錫類之聖孝普被寰區而剏見之皇猷昭  
垂華夏矣臣謹以所輯孝經貫註二十卷孝  
經存餘三卷孝經考異一卷孝經對問三卷  
隨本奏聞等因崇禎七年十二月十八日奉



聖旨孝經委宜表章這註解着該部看詳具  
奏欽此欽遵抄出到部送司案呈到部看得  
孝經一十八章孔子之述作誠百行之宗五  
教之要也國家隆尚經學典制定以四書五  
經取士如日中天而孝經旅列於十三經註  
疏中以資誦說自西漢以來註解殆及百家  
惟孔安國鄭康成最著至唐玄宗採集諸儒  
翦繁撮要以行於今莫之有改而生員瞿罕  
乃覃思搜索字箋句釋爲貫註存餘考異對

問各卷以獻雖其中固不無附會汎濫之處  
然亦可謂卽流遡源著述不妄者矣合無准  
從書肆刊布以無虛其六年苦心而至於命  
題一節崇禎二年奉有

明旨已經覆請一遵

聖祖頒定之舊第孝經雖不並於四書五經  
自不後於小學性理今依朱子定本頒行令  
督學師儒等官凡遇考試生童將孝經小學  
性理三書間出論題仍不時講究使多士翕

然誦習立行蒸蒸庶幾上副表章之旨而於  
皇上以孝治天下之隆義不無裨益矣謹將  
御前原發下孝經貫註一部隨本進繳統候  
聖裁崇禎八年三月十一日具題十六日奉  
聖旨孝經原隸學宮着兩雍及直省各學臣  
嚴飭士子同小學俱務誦讀力行考試仍一  
體命題以驗有無熟習所進貫註不必刊布  
欽此

呂維祺曰漢興表章六經以篇帙殘缺

既置博士復令諸儒集較遂成全書惟  
孝經未及劉向孔安國嘗較正之各自  
名家然文帝光武諸帝已加意表章矣  
及晉隋唐宋諸帝俱於孝經特加尊崇  
王安石與司馬溫公有隙以溫公進孝  
經遂罷黜不以貢舉至今猶未恢復今  
錄李齊古溫公兩表而唐宋得失之林  
亦可概矣溫公進呈劄序併錄於篇而  
以太學生江旭奇瞿罕等疏附之并錄

孝經大全卷之十九  
明旨表章之盛以見我

皇上之加意孝經非漢唐以下主所可幾萬  
一也恢復孝經以符元鈞滄子五百年  
王者興起之期望豈非孝治一大機哉

孝經大全卷之十九  
終

孝經大全卷之二十

明新安呂維祺箋次

表章通考

入告

疏

進呈孝經疏

呂維祺

奏爲恭進孝經本義大全或問伏祈睿斷頒  
布以羽翼化理事臣聞宋儒蔡沈言二帝三  
王之治本於道二帝三王之道本於心臣以  
爲二帝三王之心本於孝昔堯親睦而時雍

舜齊粟而風動禹致孝而祇台岡距湯思考  
而肇修人紀文武止孝達孝而汝墳遵化四  
海永清大哉孝乎天經地義神明四海一以  
貫之矣世入春秋孝治之道邈焉孔子刪述  
六經筆削春秋復作孝經者蓋所以會六經  
之指歸繼帝王之道統以明治天下之大經  
大法端在乎此漢唐宋雖代有表章然止設  
科取士而猶未深知其爲興道致治之本也  
我

太祖高皇帝首諭孝順父母

成祖文皇帝御製孝順事實凡我 列宗皆  
崇孝行然表章頒布千秋盛事猶闕以待我  
皇上之善繼善述爾而我

皇上仰法 二祖 列宗躬行孝道以明教  
化故加意聖祖六諭孝經小學以爲化民成  
俗之本今六諭解註小學集註頒矣至孝經  
有孝經全不講究之諭孝經委宜表章之旨  
孝經着學臣嚴飭誦讀力行考試一體命題



之旨頃於本年五月內又有 聖祖六諭小學孝經果否遵旨通行講讀考試撫按年終類奏該部詳加甄別以憑黜陟之諭而適與尊崇 聖母徽號之恩詔會是

皇上躬行孝道表章孝經至矣而尚未頒發定本坊刻舛誤不一士雖留心此經莫知適從故頒發萬不容緩也臣潛心此經二十餘年不揣愚陋僭著本義二卷大全二十八卷蓋求合乎孔曾相傳之心法與明王孝治天

下之大經大法而不規規於訓詁事親一節  
第世祖固習宗旨未明復僭著或問三卷所  
以釋群疑而明大意謹繕寫成帙恭撰表文  
一通附卷首以進伏祈

皇上深維孝治之本曲賜乙夜之覽倘一得  
可採祈勅禮部覆議頒行以爲羽翼化理之  
助臣惟願我

皇上早奏明王孝治之效以建中興第一事  
業同符 二祖光顯 列宗臣當與父老子

弟共歌咏聖化於無窮矣臣曷任激切待命之至崇禎十二年九月十七日奉

聖旨這所進孝經有裨治理該部會同翰林院再加較正詳備具奏

敬陳表章疏

奏爲敬陳表章孝經八要以課實責效事項臣恭進孝經本義大全等書復具八要一疏蓋嘔心條議欲課實效而通政司新奉限字嚴旨未敢封進微臣愚蓋尚鬱該部看議奚

憑敬遵旨分疏補牘再請臣惟帝王致治之本惟孝爲先孔曾相傳之宗此經爲要非天子孰敢考文惟大孝斯能建極宋臣尹焞曰孝經非堯舜大聖不能盡先臣王禕曰是書有關世教甚重豈曰小補我

皇上仁孝聰睿超出千古帝王之上而崇重孝經爲第一經卽興舉孝治爲第一務想聖心深契必不止出題誦習已者誠自聖躬以及教儲睦族自朝廷以及鄉國郊遂自官僚

以及介冑氓庶無非孝之一道包羅無非

皇上之一孝感通將見道貫三靈功苞萬象  
動天地而降休徵感鬼神而昭景福其功可  
勝言哉抑臣謂此非人之所能爲也天也昔  
元隱士釣滄子嘗言至經安得竟廢不行五  
百年必有王者興嗣是必有明王振作是經  
者考宋罷孝經今適五百餘年乃知天意若  
閔留之以待

皇上之興起之也契十八章未墜之微言明

二千年久晦之大義闢遺經而揭日月崇正  
學以及乾坤明王孝治之烈自我  
皇上始闢之故曰天也非人所能爲也臣受  
恩深重所以礪愚忠甘勞怨以事

皇上者惟一部孝經而已舍誠正別無學術  
非堯舜何敢陳前故願

皇上以明王孝治之道治天下蓋決之天意  
有默屬焉爾伏祈勅部將臣八要另疏詳議  
舉行庶孝治可立見於今日而屢諭不至托

諸空言矣崇禎十二年十一月十二日奉  
聖旨該部知道

再陳表章疏

奏爲再陳表章孝經第一要事臣惟表章八  
要首在

皇上躬行大孝故其一要曰進講經筵以樹  
模範蓋天子之孝與臣下異而

皇上之大孝又與三代而下之帝王異何者  
臣下以一身一家爲孝

皇上以興起天下之孝爲孝也三代而下以  
試士爲表章

皇上大孝以樹模範奏孝治爲表章也先臣  
丘濬有言人君肇修人紀愛敬旣立則家國  
天下無不感化我

皇上聖由天縱孝本性成嘗諭臣下曰朕不  
敢與

天地

祖宗並此不敢之心大孝也充此心以敬天



仁民錫類不匱當深居燕閒時披閱孝經詳  
玩意義仍命儒臣進講經筵詳加啟沃於以  
立愛敬而具天下之孝樹模範而奏孝治之  
化道豈遠乎哉

太祖高皇帝曰孔子明帝王治天下之大經  
大法於萬世

成祖文皇帝曰人君之孝與庶人不同又曰  
朕宮中恒觀書深有啟沃

宣宗章皇帝曰朕宮中無事時取書籍玩味

亦得胸次開豁此誠

皇上之所當法者然世儒之言曰今天下貪  
欺成習兵食告匱流土交訐何汲汲於此臣  
以凡此者政由教化之未明人心之未正反  
經之未實故也矧一代之人心風俗聲教德  
化皆繫於人主之精神好尚蓋上之精神天  
下之所繩從而鵠望也如東漢之節義唐之  
詩賦宋之理學風教所植人心景從况  
皇上精神所注首以孝經立之繩鵠而天下

有不翕然丕變者臣不敢信也孔子曰吾志  
在春秋行在孝經誠行孝經於今日之天下  
使天下之服習孝經者皆願爲忠臣孝子皆  
欲實爲朝廷任事豈復憂貪欺憂兵食憂盜  
賊何者得其本故也得其本而凡古明王之  
以孝治天下者其道皆可該也愛敬盡而德  
教立即察天地通神明光四海一以貫之矣  
崇禎十二年十一月十二日奉

聖旨禮部知道

三陳表章疏

奏爲三陳表章孝經二要三要事臣旣以孝治歸本

皇上躬行大孝爲第一要矣其次則教儲睦族皆孝治之最大者是以敢次第言之二要曰東宮講習以端儲教三要曰頒諭宗戚以敦親睦何以明其然也臣聞 太子天下之本儲教致治之原我

皇上加意豫教命 太子出閣講學所以端

孝經大全卷之二十一  
軌樹範養正作聖無不肫摯臣以爲尤必先  
教以孝蓋孝德之本教所由生使 太子當  
蒙養時卽知問安視膳溫清定省而預啟迪  
之以舜之大孝文之止孝武之達孝如孝經  
一書更當朝夕溫習諭令儒臣開導講解以  
爲異日孝治天下之本昔我

太祖高皇帝曰爲 太子者當知敦睦九族  
隆親親之恩我

成祖文皇帝曰 皇太子當進學之時欲使

知要庶幾將來太平之望我

仁宗昭皇帝諭楊士奇等曰東宮開講筵當以大經大法進說此非我

皇上之所當法者乎臣又聞堯典曰克明峻德以親九族九族既睦平章百姓若是乎大孝之先篤親也昔我

太祖高皇帝諭秦右相鄭九成等曰朕封建諸子選用傅相凡與王言當廣學問陳忠孝使其聰明無蔽上下相親我

孝經大全卷之二十一  
成祖文皇帝賜蜀王書曰敦孝循理好學不  
倦勉自愛重用副所懷又曰國家篤於親親  
宗室謹於禮法共保富貴令聞長世此又非  
我

皇上之所當法者乎我

皇上篤念宗親備極優渥而頃又允閣臣楊  
嗣昌之奏申諭諄切加以勅獎誠諭可謂仁  
之至義之盡臣以爲當頒孝經於各王府宗  
親俾各服習體認以成親睦之仁至於戚

一體頒諭宗學一體試題仍乞諭令選舉換授必以敦孝行通孝經爲本庶孝愈篤於本支義共固於維城矣

皇上旣自身而家自家而國而天下修齊治平之本裕如已伏惟睿斷施行崇禎十二年十一月十二日奉

聖旨禮部知道

四陳表章疏

奏爲四陳表章孝經四要五要六要事臣惟



皇上端孝範於上而以孝正元儲之養蒙篤  
九族之親睦矣又其次則揆文奮武宜弘薪  
樵之運而醇菁莪之化也故四要曰頒行試  
題以驗習學臣聞孝爲百行之原孝經統六  
經之會

皇上加意此經業命誦讀試題矣然該部原  
疏但云將孝經小學間出論題耳合無責令  
兩雍省直師儒學官凡遇貢監生儒考試照  
經書出題作制義如解卷無孝經制義以不

職論昔

太祖高皇帝謂教化之道學校爲本宜講論  
聖道使人日漸月化

成祖文皇帝謂學較風化所係在上人之作  
興耳則

皇上仰法

二祖教天下以孝作忠者道必本乎此也五  
要曰鄉會出題以隆大典臣聞漢唐以來率  
用孝經取士如漢置孝經博士唐以論語孝

經孟子爲一經宋尚書省加試論語孝經其  
來已久自王安石黜孝經貢舉遂不以取士  
矣今制鄉會試初場題例以四書三篇經四  
篇合無勅令習本經者皆通孝經遇鄉會試  
令出孝經題一道列於四書後本經前減本  
經一篇卽自十三年會試爲始

成祖文皇帝曰孝經者聖賢之格言大訓

宣宗章皇帝曰設科求賢願得忠孝之人以  
資國用朕之心亦如此則

皇上頒行孝經成 成祖 宣宗之志此正  
繼志述事之大孝也六要曰頒諭武士以明  
大義臣聞宋儒程顥看詳武學欲添習孝經  
曰欲令武勇之士知義理故東漢時有令虎  
賁士習孝經者有令期門羽林通孝經章句  
者而我

成祖文皇帝曰申明武學嚴其課讀毋爲文  
具

孝宗敬皇帝曰公侯駙馬伯子孫令讀書習

禮將來朝廷庶得世臣之用伏祈

皇上諭頒孝經於天下武學其考試必間出  
孝經題目其武場鄉會試亦一體出題至公  
侯指揮世襲等官子孫承襲必間抽孝經一  
二段令背誦讀解通者方許承襲庶干城腹  
心之士猶有敦詩書悅禮樂之風焉統惟  
皇上舉行以光文武薪標菁莪之典崇禎十  
二年十一月十二日奉

聖旨該部知道

五陳表章疏

奏爲五陳表章孝經七要八要事臣旣陳表章六要夫如是皇極建而元良貞一本敦而群策儲矣然而辟舉不真風俗不醇雖欲復古孝治猶未也故次七要曰辟舉真孝以勵士俗臣聞漢辟舉孝廉猶爲近古我祖宗朝尤加意行之

太祖高皇帝曰爲國得寶不如得賢又曰但嚴舉錯之法則冒濫自革

宣宗章皇帝曰務選經明行修之人不得濫舉

皇上旣命復辟舉矣然必深明辟舉之首重乎孝使天下知上意之所重然後可挽澆俗而於變耳合無勅令撫按遵奉新頒聖諭每年終類奏各舉通習孝經孝友廉讓者無論紳衿隱逸多不過三人有奔營濫舉者連坐其提學考較巡按出巡聽酌舉真孝徑自獎勸優賞如黃香扇枕溫席而舉授榮親王

元規著孝經義而詔舉高第皆其遺事也終  
八要曰諭俗講解以正民風臣聞化民成俗  
以孝爲先

太祖高皇帝曰風俗本乎教化教化行雖閭  
閻可使爲君子

成祖文皇帝曰近俗簡於事親此蓋教化不  
明之過合無勅令天下府州縣官於講鄉約  
時先宣 聖祖六諭間亦講說孝經務令通  
俗易曉以化鄉愚凡塾師教習處皆領孝經



一部命誦講解其士民杖笞小過果能背誦  
講解明白者亦准寬宥如司馬光講庶人章  
以誨父老真德秀作庶人章解以化泉民又  
如王漸誦孝經義而鄉里慚謝韋景駿以孝  
經化貴鄉而母子感悟皆其成效也總之表  
章八要以朝廷爲萬國之倡俾天下皆講明  
正學實敦孝道如此而期月之間紀綱粗布  
行之三年有不成教化變風俗裕兵食再久  
之而有不復祖宗淳熙之化舞干兩階幾致

刑措真才輩出輔德翼治者乎帝德巍煥不  
識不知而順則王道蕩平無偏無黨而式度  
斯文未喪至孝通神惟在我

皇上獨斷而實行之焉崇禎十二年十一月  
十二日奉

聖旨禮部知道講讀已有旨了

補陳表章孝經四翼疏

奏爲補陳表章孝經四翼以備採擇事客歲  
臣恭進孝經奉

孝經大全卷之二十一  
聖旨這所進孝經有裨治理該部會同翰林院再加較正詳備具奏臣續陳表章八要奉聖旨下部議覆矣茲聞邸報禮部題爲科場留期等事奉

聖旨孝經章數無多若更定一題易於揣摩打點這會場七題還仍舊或於科歲二考間出以觀士子學習條欵嚴飭行欽此謹恭繹明旨補陳四翼一曰定本頒發宜早我

皇上加意孝經命科歲出題以觀學習矣坊

刻非無孝經但舛謬不一有僞古文加題名  
者有傳會分傳者有增減字句改移章次段  
落者士子學習安所適從故頒發誠不可一  
日緩也二曰科場試題宜酌奉旨請章數無  
多易於揣摩仰見

皇上隆重孝經慎誌制舉至意臣愚謂孝經  
逐句出題誠少若比類推擬以長短搭截章  
節句段之題通計之不下千餘道揣摩豈易  
蓋非科場出題無以鼓舞人心變化士習在

漢唐尚能設科豈聖朝終成闕典且仍舊云  
者似止就今科會場論非阻後來科場表章  
之路也三曰聖經闡翼宜隆臣聞漢唐宋謂  
孝經章數不多故有附論語或附孟子爲一  
經臣謂孔子作孝經以垂憲萬世直當孤行  
於世何必他附倘必存乎見少請以孝經附  
大學便蓋四書記孔子問答之言五經孔子  
所贊定筆削者獨孝經與大學聖經其所作  
也若以二經合而名之曰孝學使天下知孝

與學非二物孝學與治天下國家非二事每  
科首出孝學一題次出論語中庸孟子各一  
題次出本經三題豈非千古盛事自  
皇上始乎四曰臣工激勵宜切

皇上教臣下廉毋貪恬毋競蕩平毋黨實心  
任事毋欺飾而臣下未然者豈免而無耻與  
抑忠孝之本未講明與宜頒孝經於大小文  
武內外臣工使朝夕捧誦講明體認如是而  
尚不廉不恬不蕩平不實心任事是爲不忠

孝經大全卷之二十一  
不孝無耻之尤者三尺何辭此臣補陳四翼  
與前八要等疏互相發明總以

皇上隆重慎悉至意伏惟

聖明採擇施行臣何任端仰待命之至

### 七陳表章疏

奏爲七陳表章孝經六便七益併擬試題以  
重科場首務事臣前疏以孝經科題與大學  
或合而同出或總而間出或另而專出業請  
候裁矣弘表章之盛舉光取士之大典蓋有

六便又有七益何謂六便孔子一生止作此  
二經一也二經皆曾子筆記二也文法義理  
相似三也聖門道統賴此二經之傳四也使  
天下知孝學非二物孝學與治天下非二事  
五也國制科題大學序論語前中庸序論語  
後今孝學相合首出一題不致前後參差六  
也何謂七益使天下首務講明忠孝之義一  
也使士子顧名思義知經書之源設科之義  
首重忠孝二也舉世皆尊崇孔子顧獨淺近



其自作之經千古曠典自

皇上舉三也孔子明二帝三王之道本於孝  
皇上傳二帝三王之孝本於孝經四也自皇  
躬以及天下國家無非一孝所貫皆自表章  
孝經始五也漢唐猶以孝經附他書後儒多  
以刪改生異議

皇上獨隆重定本一洗漢唐之陋而正後儒  
之譌六也宋君臣黜孝經不設科者五百餘  
年

皇上一旦復古功在聖道功在萬世七也此  
其表章豈僅科場出題已哉卽以科場題論  
亦自不少臣常比類推擬約單句題二百零  
一道雙句題一百六十六道連句題三百零  
九道摘段題一百六十八道搭截題七十六  
道全章合章搭章一百九十二道共約一千  
一百一十二道臣恐以字數踰格有煩

聖聰另送閣部備聖明取覽該部酌覆之資  
蓋臣生平精力專在於此六載林居萬念灰

孝經大全卷之二  
冷獨此羽翼孝經孤志耿耿百折不變且妄  
謂帝王治天下之孝弟德教禮樂刑政泰交  
功化無一不備於孝經業箋輯孝經衍義外  
傳等書百十餘卷次第垂成倘不卽填溝壑  
會當敬獻楓宸昔我

成祖謂孝經爲格言大訓而我

皇上亦曰所進孝經有裨治理倘忘臣之迂  
且愚而採納之聖道之幸世道之福也臣之  
願也非所敢必也

先太傳孝經註疏既以表文進呈又陳表  
章八要以功令述字踰格列疏五上  
及表章四翼六便七益疏凡八上業  
蒙嘉納而頒布學宮鄉會命題之旨  
猶未及行嗟乎一生功力千古心傳  
斯文未喪吾道誰屬聖人之書安得  
終廢不行乎入告之後附以進呈奏  
疏原進呈大全合節畧大全通考共  
二十八卷今增以入告奏疏合節畧  
首卷共有二十九卷男兆璜敬識

孝經大全卷之二十 終